

中國圖書集成

沈氏遺集

沈氏農書

錢爾復訂正

中華書局

沈氏農書

清 邇溪錢爾復子湘訂正

逐月事宜

正月立春雨水

天晴 墾田 種桑秧 理菜麥溝 倒芋茭田 倒地 下地壅 簞泥 修桑 澆菜麥 刮蟻

陰雨 修桑 刮蟻 簞泥 雷田泥 撒蠶沙 載壅 劈柴 編蠶簾_即蠶簾 秧界繩

雜作 治畦坂 修路

置備 打鐵扒鋤頭桑剪 蘇杭州買糞 買柴炭 買簍衣箬帽杓蒲 蘇州買糖燒酒 豆泥

角直糴

二月驚蟄春分

天晴 倒地 刮蟻 下菜壅 倒田 澆桑秧 掀溝 簞泥 利溝 倒秧田

陰雨 修桑 刮蟻 修圩岸 劈柴 椿地攤 作勝修溪 掀溝簞泥 載壅 鋤車屏 簞田

泥 捆桑繩 架山繩 撒柴

雜作 接桑樹果樹 看出屑蛙 下苞子瓜子 下麥種沈麻子 取足修船之用

置備 喚剪桑工 修篋籠 換炭 買芥菜鹽 燒香買糊箔紙 買小鴨 糴螺螄入池 雇忙月

三月清明穀雨

天晴 刮地 沈梅豆 倒田排芋種 澆桑秧 墾花草田 簞泥
陰雨 窖花草 作秧田 刮二蟻 載壅劈柴 簞田泥 把桑繩 鋸車屏
雜作 雇匠作車屏鶴膝 前此日短以後工忙 雇匠修蠶具絲車車伏 修釘菱芋菱梗種菱
種瓜豆葡萄秧 捉蛙蟲 浸穀種

置備 買茶葉 醃芥菜 買水杭

四月立夏小滿

天晴 刮地 謝桑 斫菜麥 種茄秧 倒地 倒花草田 壓桑秧 刮豆板 沈晚豆 栽桑
澆桑秧 看三蟻 帶露種芋苳 剪桑
陰雨 看三蟻 窖蠶沙梗 窖梅豆拇 割麥 折麥輪 下田 雨後看地溝桑秧
雜作 架瓜豆棚 澆瓜茄豆葡萄秧 沈赤豆
置備 買糞謝桑 平望買牛壅 濬陰溝過蠶 修路 買蒜苗 醃青菜 南潯買繭黃 捉漏過蠶 買蠶蟻入地

五月芒種夏至

天晴 刮地 澆桑秧 澆瓜豆茄秧

陰雨 拔地草 挑草泥 斫地攤厝脚 下田

雜作 打菜油 扳桑附枝

置備 買蒜 醋蒜 買麻布 糴大麥 熏楊梅 醃梅子

六月小暑大暑

天晴 刮地 拔梅豆 伏內倒種菜地 鋤田 捏頭蟻

陰雨 下田

雜作 種晚豆 收藏蠶豆梅豆并大小麥種 斫黃麻

置備 發枯葉定錢 買勒魚入糟 作瓜茄乾 合醬油

七月立秋處暑

天晴 刮地 盪田 芸田 修桑 捏二蟻 把桑

陰雨 下田 修桑 把桑 捏蟻 栽壟

雜作 下接力 下麥種 下紅蘿蔔子早菜秧 合蠶叢 種葱

置備 上路買羊草

八月白露秋分

天晴 刮地 作泥磚 種菜 撒菜秧 簞泥 刪紅蘿蔔 刮河泥 倒地 下白蘿蔔子 下

地壅

陰雨 簞地壅泥 絞簞竿 押簞繩 糞桶繩 研地攤蘆草

雜作 捉蛀蟲 修船 抹車油 翻千年久根 治地攤蠶豆 線雞 撒花草子 接桃樹

置備 籬桂花 買簞竿稻扛 合酒麴 醃菱拇 買辣火 買稻缺鎌刀篩匾 買菜鹽

九月寒露霜降

天晴 墾地 收早種 勒葉 治蠶豆 簞泥 墾麥埕

陰雨 簞泥作稻地 挑泥磚到家 打稻巴載壅押牀簞繩索

雜作 捉蛀蟲 修竹鋤竹地 伏鵝蛋 作絮 挑稻稈泥

置備 買菜莢 買絮骨 平望買牛壅 籬白 糟茄薑 烘青豆

十月立冬小雪

天晴 斫稻 墾麥埕 墾地 曬穀 澆菜菔 治麥澆麥

陰雨 磴稻 簞泥 斫蘆 作米 縛圍 繩索

雜作 拔晚豆赤荳 種青菜 芥菜 藏芋種 採菱收種 起魚糞

置備 平望買牛壅 桐鄉買枯葉 作十月白酒 山裏買草柴 各鎮訪租窖 作蘿蔔菜乾

十一月大雪冬至

天晴 壅地 壅菜埭種菜 曬穀 提麥溝菜溝 簍泥 種大小麥秧

陰雨 提溝 種菜 簍泥 斫羊茅 刮頭蟻 截桑傀儡 作米 打米 載壅 繩索 縛園

雜作 收藏種穀 載羊葉 挑稻稈泥

置備 糴籠糠 買香橙 糴糠 作風魚火腿 糴白粳 訪租窖 踏鹽齋菜 買蟹糠醬

十二月小寒大寒

天晴 下地壅 壅板田 澆菜 簍泥 刮頭蟻 壅了田菜麥田中剩下者

陰雨 簍泥 刮蟻修桑 載壅 打米 繩索 簍泥羊茅埂

雜作 備斫樹枝 削地攤塍脚候春另作 編籬笆 車地潭

置備 買榆樹 買臘鹽 買好酒 換蠶作醋 買臘柴 買過地久秧 買臘豬油於嘉興

運田地法

古稱深耕易耨。要見田地全要墾深。切不可貪陰雨工閒。須要晴明天氣。二層起深。每工止墾半畝。倒六七分。春閒倒二次。尤要老晴時節。頭番倒不必太細。只要稜層通噉。徹底翻深。若有草則合拾倒好。若壅灰與牛糞。則撒於初倒之後。下次倒入土中更好。

一種田之法。不在乎早。本處土薄。早種每患生蟲。若其年有水種田。則芒種前後插蒔爲上。若旱年車水種田。便到夏至也不妨。只要倒平田底。停當生活。以候雨到。雨不到而車種。須前一日車水。次日倒田底。第三日插秧。使土中熱氣散盡。後無蛙蟲之患。凡種田固不出糞多力勤四字。而墊底尤爲要緊。墊底多。雖遇水大而苗肯參長。浮面不致淹沒。遇旱年雖種遲。易於發作。其插種之法。行欲稀。須開七寸。段欲密。容盡足矣。平底之時。有草須去淨。如削不能盡。卽拔去而後平底。蓋插下須二十日後。方可下田拔草。倘插時先有宿草。得肥驟興。秧未活而草已滿。拔甚廢力。此俗所謂畝三工。若插時拔草先淨。則草木生而苗已長。不消二十日。便可拔草。草少工省。此俗所謂工三畝。只此兩語。豈不較然。況又有水旱不時。車戽不暇。須預喚月工。多喚短工。撓先作起。頭番作得乾淨。後次省力。今日拔草。明日卽要橫鋤。所謂頭番不要早。二番不要遲。當使草管無處著脚。兩鋤俱要將土翻箇轉身。不徒移動場屋。屋當讀窩去聲計小暑後到立秋不過三十餘日。鋤盡芸四番生活。均勻排定。總之不可免。落得上前爲有益也。立秋邊或

盪乾或苦乾，必要裂縫方好。古人云：六月不乾田，無米莫怨天。惟此一乾，則根深幹蒼，結秀成實。水旱不能爲患矣。乾在立秋前，便多幾日不妨。乾在立秋後，纔裂縫便要車水。蓋處暑邊正作胎，此時不可缺水。古云：處暑根白頭。農夫吃一嚇。下接力須在次暑後。次暑，豈大暑耶。苗作胎，便在苗色正黃之時。如苗色不黃，斷不可下接力。到底不黃，到底不下可也。若苗茂密，度其力短，俟抽穗之後，每畝下併三斗，自足接其力。切不可未黃先下，致有好苗而無好稻。蓋田上生活，百凡容易，只有接力一舉，須相其時候，察其顏色，爲農夫最緊機關。無力之家，既苦少壅，薄收，糞多之家，又患過肥，穀糲，究其根源，總爲壅嫩苗之故也。而扼要之法，一在壅倒極深，深則肥氣亦深，徐徐引根使長，根愈深遠，幹愈壯實，縱接力薄，原來壅力可以支持。若更加壅，譬如健漢加餐，酒人加飲，有益無害。此篇第一著。一在多下墊底，墊底多，插下便興。到了立秋，苗已長足，壅力將盡，苗老色黃，接力愈多愈善。一在六月內乾過一番，則土質根牢，苗身堅卓，堪勝壅力，而無傾倒之患。但自立秋後，斷斷不可缺水。水少，卽車直到斫稻方止。古云：稻如鶯色紅。紅者，音同紅。全得水來供。若值天氣驟寒，霜早，凡田中有水者不損，無水者稻卽秕矣。先農云：飽水足穀，此之謂也。

一種稻以早白稻爲上。只肥壅不易調停，少壅不長，多又損苗。但喜其米粒粗硬而多飯，所宜多種者。

黃稻耐水旱。壅多不害。只怕霜早。米不圓滿。其餘稻色不同。總無如此二種。所宜四六分種。或均分種之。以便次第收斫。不致忙促。先農嘗卜稻色之吉者而多種之。亦是一法。

一、壅麥埋堆乾田最好。如爛田須壅過幾日。待輪背乾燥方可沈種。倘時候已過。先浸種發芽。以候輪乾。切不可帶溼踐實。菜麥不能行根。春必萎死。即不死亦永不長旺。沈麥蓋壇要滿。撒子要勻。不可惜工。而令婦女小厮苟且生活。麥澆子。菜澆花。麥沈下時澆一次。春間澆一次。太肥反無收。大麥種麥則不厭肥。又要肥在後半。若八月初先下麥種。候冬壅田移種。每顆十五六根。炤式澆兩次。又撒牛糞揪溝蓋之。則幹壯粒粗。收時倍獲。菜比麥倍澆。或垃圾。或牛糞。揪溝蓋再澆穀花。即有滿石收成。重田不須熱底。凡菜麥揪溝之後。候乾再刮一番。每畝不過半工。而泥鬆碎易討刀。且不起草。又可換根不患風倒。

一、壅地須在冬至前。取其天氣嚴寒。風日凍曝。炤田壅深二層。桑樹細根斷亦無害。只要稜層空起。若倒地則春天雨水多。又要壅平。又不要帶水。背後足迹俱揉之使平。冬天草根翻在上。春天草根翻在下。先農所謂寒則朗。熱則藏也。壅倒俱宜晴天。若倒下不曬一日。即逢雨。不如不倒。至於刮地。尤要大晴。須草未生時。夏天約二十日一刮。未草而刮。二十日尚未起草。草多而刮。十日草已茂矣。一樣工夫。皆在草頭上作。孰若搗先作上。頭番作得乾淨。後次省力。一年之計在春。正謂此也。西鄉只倒不刮。本處只刮不倒。也須刮深二三寸。雖大陣雨不衝淋浮泥入水。若止於刮草輪面。上浮下實。一逢大雨。盡將面泥淋剝計。

一年撚泥幾何。堪此剝削。論來只宜抹倒。不必徇俗也。況發葉時。未必日日晴。未免踐實。此時決宜趁晴倒曬。則黃霰不大起草。萬一黃霰久雨。不能刮倒。草盛宜拔。或掀開溝卸水。每刮倒一番。自然有泥塊落溝。遇大雨必處處看瞭。有水卽導。雨一番。看一番。不可忽也。

一種桑以湖葉桑黃頭桑木竹青爲上。取其枝幹堅實。不易朽。眼發頭有肋兩。其五頭桑大葉密眼次之。細葉密眼爲最下。又有一種火桑。較別桑早五六日。可養早蠶。凡過二月清明。其年葉必發遲。候葉下蠶。蠶恐後期。屋前後種百餘株備用可也。種法以稀爲貴。縱橫各七尺。每畝約二百株。株株茂盛。葉便滿百。不須多也。內地年前春初皆可種。外地患盜者。清明前種。年前秧以大爲貴。清明秧以細爲貴。蓋大桑到清明。頭眼已發。根眼已冒。細葉則根眼方綻故也。根不必多。刷盡毛根。止苗線根數條。四方排穩。漸下泥築實。清水糞頻澆。引出新根。黃霰尤宜澆。澆法不可著幹。嘗離幹尺許。遶樹周圍。使新根向肥生去。發眼之後。不時要看看。若見損葉。必有地蟲。亟搜殺之。遇大雨一止。必逐株踏看。如被泥水淋眼。速速挑開。否卽死矣。雨一番。看一番。至緊至緊。其剪法縱不能如西鄉樓子樣。亦斷不可如東鄉拳頭樣。試看拳頭桑。桑釘眼多。身如枯桑。一年缺壅。便不能發眼。卽行悶死矣。密眼桑留半寸許。五頭黃頭苗二寸許。寧可有油瓶嘴。另日修剪可也。嫩桑又必多留傀儡。須盡截去。古云孝順種竹。忤逆剪桑。修桑乃一件正經事。且不費忙工夫。約一年修四番。二葉初芸時。不可多打葉片。致嫩條輭折。此時預防損折。不免多留種田畢。細看一番。但多留細條。及新發叢葉。盡情裁去。到七月縛桑之際。凡根下抽條及丫檔叢枝。

又一切去之。至冬春修截。又看其細弱及蔭下繁密者。一切去之。剪桑畢。又看以前礙鋸而截不盡傀儡。及老枝不成器者。又一切去之。其老油瓶嘴。晴時堅硬難剪。不論冬春。凡遇久雨之後。雨一止。即羣出。修剪期于淨盡。設有癰桑。卽翻去之。不可愛惜。使之纏染。皆緣剪時刀上傳過。凡桑一癰。再無醫法。斷斷不可留者。漢人顏刺史德政曰。桑無附枝。甚言政成民息。農桑重事。得無閒廢也。桑鋸須木匠用生鐵者佳。桑剪須在石門買。五分一把。其刮蟻也。須三番。冬春看頭蟻。清明前看二蟻。剪畢看三蟻。一株上百顆。盡刮。遺剩一顆。亦捉蟻盡。必如此三番四覆。亦料不能淨盡。又要六月捏頭蟻。七月內捏二蟻。而頭蟻尤宜細看。留頭蟻一。則二蟻便有百。此時田工甚忙。人每忽略不上緊。不要棄一經蟻壞。縱有肥壅。有工力。亦不能救。故貴早早用心。農家惟此項最辛苦。工夫最難稽考。不得不多下工力。分地各任。庶可責成耳。其捉蛙也。須三番。春分邊捉出屑蛙。秋分邊捉條子蛙。剪桑畢。八月或九月。又細看細捉。有一等包捉蛙人。故留大蛙在樹。以待冬閒出痘之家。規取厚利。須時時矚瞭。隨見隨捉。或自備線鑿爲不時之需方好。

一、古人云。人家不興少心齊。桑樹不興少河泥。撚泥乃第一要緊事。不惟一歲雨淋土剝。藉此補益。正由撚泥之地。土堅而又鬆。雨過便乾。桑性喜燥。易於茂盛。若久不撚泥之地。經雨土爛如腐。嫩根不行。老根必露。縱有肥壅。亦不全盛。每年冬春閒撚一番。八月撚一番。每番須六工。作溝之人。也不可用搭頭。恐作溝扒泥不及。撚手亦停候矣。晴天撚在大河。陰天撚在埂地。雨天撚在壇裏。候乾抽在遠地。泥乾趁晴倒。

刮。曬曝如殼起。敲碎如粉方肥。或云擦泥固好。挑稻拌又可省工。

一、把桑繩看地起。上好茂盛地。約乾細繩八斤。以下多寡有差。生活人搓繩。上一日七八斤。酌中五斤。

一、天時大約晴七雨三。晴雨各有生活。獨孟春雨水之際。正農工湊聚時。除雨留家外。雨止即修桑看蟻修岸。至于墾倒田地。非大晴不可。人家雇喚長年。天雨無生活。不得已而墾田。若有船可以撚泥。定須開潭撚貯。以消磨雨工。其田地生活。必待晴天方作。

一、種田地肥壅最緊。人糞力旺。牛糞力長。不可偏廢。租窖乃根本之事。但近來肥壅人工俱貴。載取費力。偷竊弊多。不能全靠租窖。則養豬羊尤爲簡便。古人云。種田不養豬。必無成功。則養豬乃作家第一著。計羊一歲所食。取足於羊毛。小羊所費。不過墊草。冥然多得肥壅。養豬舊規。虧折豬本。若自養母豬。即以所賺者爲所折之本。原自無虧。若羊必須雇人斫草。則冬春工閒。誠靡廩糈。若豬必須買餅。容有貴賤不時。今羊專吃枯葉枯草。豬專吃糟。麥則燒酒又殘。風息。有盈無虧。白落肥壅。又省載取人工。何不爲也。但養豬每苦生病。生病必在春夏。以受暴寒。盛熱鬱蒸而成。欄前須空闊通風。日夏不甚熱。冬護其寒。窠不厭穢。糟須潔淨。自然無害。

一、要覓壅。則平望一路是其出產。磨路豬灰。最宜田壅。在四月十月農忙之際。糞多價賤。當併工多買。其

人糞須往杭州。切不可在埧上。買滿載當在五道前。買半載。次早押到門外過埧也。有五六成糞。且新糞肥。至於謝桑。正小滿邊。蠶忙之日。只於近鎮買坐坑糞。上午去買。下午即澆更好。

一、春天壅地。垃圾必得三四十擔。在立春左右。揀天色老晴。土色乾燥。方可倒入。地面要平。使不受水。溝不要深。則不走肥。隨撚泥蓋上。雖遇春雨。久亦無害。惟未春先下壅。令肥氣浸灌土中。一行根便討力。桑眼飽綻。箇箇有頭葉。必倍多。清明邊再澆人糞。謂之撮桑。澆一分多一分之葉。剪桑畢。再澆人糞。謂之謝桑。澆一分多一分之葉。毫不虧本。落得桑好。謝桑尤宜上緊。切不可因循。

一、牛壅載歸。必須下埧。加水作爛。薄薄澆之。若平望買來乾糞。須加入糞幾擔。或菜滷豬水皆可。取其肯作爛也。每畝壅牛糞四五十擔。和薄有百擔。其澆時。初次澆掄傍。下次澆掄背。埧要深大。每埧一桶。當日即蓋。若澆人糞。尤要即刻蓋。埧方好。牛壅要和極薄。人糞要和極清。斷斷不可算工力。主人必親監督。不使工人貪蠟少和水。至要至要。

一、羊壅宜于地。豬壅宜于田。灰忌壅地。爲其剝肥也。宜壅田。取其鬆泛也。若平望買豬灰。及城鎮買坑灰。於田未倒之前。稜層之際。每畝撒十餘擔。然後鋤。徹底鬆泛。極益田脚。又取撒於花草田中。一取鬆田。二取護草。然積瘦之田。泥土堅硬。利用灰與牛糞。若素肥之田。又忌太鬆。不耐旱。不結實。壅須開雜而下。如草泥豬壅墊底。則以牛壅接之。牛壅墊底。則以豆泥豆餅接之。然壅田果能二層起深。雖過鬆無害。花草畝不過三升。自己收子。價不甚值。一畝草可壅三畝田。今時肥壅艱難。此項最屬便利。

一田地生活。上前有功。除種田要看時候。其餘俱以早爲貴。假如刮地。未草先刮。以後永不起草。刮又省工。所謂早則工三畝。遲則畝三工也。又如捏蟻。捏頭蟻一省。捏二蟻百也。至於下豆麥尤貴早。春三月內多喚短工。預喚剪桑工。種田工忙月工。生活次第得法。仍舊省出工夫。未嘗多費糜食也。一秧田最忌稗子。先將面泥刮去寸許。掃淨然後壅倒。臨時撚泥鋪面。方可撒種。舊規每秧一畝。用餅一片。細春與種同撒。卽以灰蓋之。取其根鬆易拔。今人密密種。曰恐稗草從閒出耳。不知果能刮盡面泥。草種已絕。不妨稍疏。使之粗壯。粗壯之秧。比壅一番。不可不曉。若秋色太嫩。不妨閒乾。使之蒼老。所謂秧好半年田。蓋本壯易發生也。若亢旱之季。又不可早壅秧。與恐插蒔遲而秧蒿敗也。凡人家種田十畝。須下秧十三畝。以防不足。且備租田。俗云。二月清明多下種。三月清明多撒秧。屢試亦驗。

一作工之法。舊規每工種田一畝。鋤盡芸每工二畝。當時人習攻苦。帶星出入。俗柔順而主令尊。今人驕惰成風。非酒食不能勸。比百年前大不同矣。只要生活作好。監督如法。寧可少而精。不可多而草率也。供給之法。亦宜優厚。炎天日長。午後必飢罷。冬日嚴寒。空腹難早出。夏必加下點心。冬必與早粥。若冬月雨天。燃泥必早與熱酒。飽其飲食。然後責其工程。彼既無詞謝我。我亦有顏詰之。至於婦女。丫鬟雖不甚攻苦。亦須略與滋味。曾有經月不知肉味而能無染指侵剋者。古云。善使長年惡使牛。又云。嘗得窮六月裏罵長工。主人不可不知。舊規夏秋每人朝粥二合。晝飯七合。點心飯二合半。粥二合。夜粥二合半。春冬每人朝粥二合。晝飯七合。點心粥三合。夜粥二合半。一年牽算。每日一升五合。婦人

半之。貓犬別加料。舊規夏秋一日葷。兩日素。今宜開之。重難生活連日葷。春冬一日葷。三日素。今開二日。重難生活多加葷。舊規不論忙閒。三人共酒一杓。今宜論生活起。重難者每人一杓。中等每人半杓。輕省留家及陰雨全無。舊規葷日鯨肉每觔食八人。豬腸每觔食五人。魚亦五人。今宜稱明均給。於中不侵剋短少足矣。舊規素日腐一塊。值錢一文。當年一文值銀九毫。豆一石值價五錢。今錢值減半。豆值差倍。是今腐五塊纔抵前一塊。豈得尙以舊例行之。今後假如合與人吃腐。不須付與腐錢。而多與油水。令工人勤種瓜菜。以補其不足。舊規生活人供酒。斗米買三十杓。謂之長行酒。水多味淡。徒爲店家出息。若以斗米自作麴酒。常有二十四觔。以十二兩抵長行一杓。滋味力量竟是加倍。所慮者自作易于消耗。若頓發于領袖作工之人。計日算給。似亦甚便。與其利歸店家。孰若加厚長年。若買糟養豬。尙有燒酒賣。豈不可供給長年也。

一、湖州水鄉。每多水患而淹沒無收。止萬歷十六年戊子。三十六年戊申。崇禎十三年庚辰。周甲之中。不過三次耳。嘗見沒後復種苗秧。俱大有收。比前倍好。蓋淹後天卽久晴。人皆車戽。苗肯長發。今後萬一不幸遭此。須設法早車。買苗速種。其買苗必到山中燥田內。取黃色老苗爲上。下船不蒸壞。入土易生發。切不可買翠色細嫩之苗。尤不可買東鄉水曲之苗。種下不易活。生發既遲。卒遇霜早。終成秕穗耳。立秋前皆可種。若天色老晴。熱氣尙盛。便過立秋幾日尙可種。種下只要無草。不可多作生活。尤不可下壅。下壅作工。則苗貪肥長枝。枝多穗晚。有稻無穀。戒之戒之。故大水之季。未種而水至。則以車救爲主。不救則以

復種爲主。大凡淹沒之時。人情洶洶。必有阻惑。謠言勿可聽也。

一、修築圩岸。增高界境。預防水患。各自車戽。此捍災禦害之至計。歲奉功令。無容怠緩。至於脚塍。亦要年年作一番。不惟便於挑泥挑塍挑稻。一切損苗之蟲生子。每在塍脚地攤之內。冬閒剗割草根。另添新土。亦殺蟲護苗一法也。

一、地壅果能一年四壅。撚泥兩番。深壅淨刮。不荒不蟻。每畝採葉八九十個。斷然必有比中地一畝。採四五十者。豈非一畝兼二畝之息。而工力錢糧地本仍只一畝。孰若以二畝之壅力。合併於一畝者之事半功倍也。曾見老農馬姓者云。三石也是田。兩石也是田。石五也是田。多種不如少種好。又省氣力又省田。地作家者第一要勤耕多壅。少種多收。第二要寬恤租戶。不致退佃。不幸遇水旱之年。度力量不能徧及者。只須去半救半。不可奢戀兩廢也。記之記之。

一、長年一名。工銀三兩。吃米五石五斗。平價六兩五錢。盤費一兩。農具三錢。柴酒一兩二錢。通十二兩。計管地四畝。包價值四兩。種田八畝。除租額外。上好盈米八石。平價算銀十兩。此外又有田壅短工之費。以春花稻草抵之。俗所謂條對條。毫無贏息。落得許多早起晏眠。費心勞力。特以非此碌碌不成人家耳。西鄉地盡出租。宴然享安逸之利。豈不甚美。但本處地無租例。有地不得不種田。種田不得不墾長年。終歲勤動。亦萬不得已而然。第使子孫習知稼穡艱難。亦人家久長之計。每看市井富室易與易敗。端爲子弟享逸思淫。現錢易耕耳。古云萬般到底不如農。正謂此也。